

“La verità vi farà liberi, la bugia vi farà ricchi” (S. Giovanni Aretino)

IL GJESPAR DE CARIÂT

Sar Diretôr de Vite Catoliche,

il plevan di Manzàn, par fâj savê a Pauli Varut ce ch'al pensave di lui, al à doprade la Vite Catoliche. Jò o soi plui disfurtunât di lui, par vie che ti à parût di “chiudere l'argomento” e cussì no pues rispuindi a di chê sglavinade di lauts che ti son plonbâts, a tì, a B. S. e a Pup, dopo de tamesade de setemane passade. Ti visi però che copie di cheste letare ur e mandi tant a Pauli che a Tunìn. E vignìn al pont.

Tu às di vê vude une sodisfasion che ce a vioditi capitâ di dutis lis parts dal Friûl (ancje se, in pratiche, dome di une bande!) tantis adesions. Varessistu mai crodût di vê amions di che fate? int che ti vares sbilfât zà fa un an e che cumò, compate, si è metude de to bande? O à gust che tu vetis provât il ghiti de vitorie. Dome ch'a jè stade une vitorie avonde sclagne e t'al spiegarai a la buine ma cun clarece.

Pauli e Tunìn ti vevin dade une pussibilitât tremende par spiega a ducj chêi ch'a ti lein il to mût di fâ un giornâl, il to jessi part vive di une glesie vive, lis tos inpinions e la linie pulitiche e vie discorint. Lôr ti àn fatis domandis precis: ce che la Glesie Furlane e intint di dî in chest moment a di un popul ch'al à di tornâ a ripiâsi; ce sieltis pulitichis ch'a fâs; trop coragjo che à tal metisì cuintri s'al covente e cemût che il to giornâl, espression di une glesie, al intint rispjetâ il dolôr e la dignitât dal popui furlan. A erin domandis di fonde, che ogni giornalista al vares gole che j es fasessin par sclarî il so pinsîr. In font, si trate des stessis edentichis domandis che ti vin fat jù a Udin chêi pôs viâz che si sin cjatâts e ch'a vevin di jessi il telâr de “gnove Vite Catoliche”. Sclarît chel, sul rest si podeve passâ ancje parsore. Ma lî no tu às voltût rispuindi, mancjant a di un apuntament golôs e che nol tornarà plui, par vie che no starìn plui a cori daûr di un muart.

Invessit di rispuindi tû, che tu eris clamât tû in cause, tu às passade la letare al Vescul, come chei canais ch'a van berlant: “Mame, mi àn petât!”. La mame, galiote, no à rispuindût, no jè saltade fûr cul mescul, ma ti à dit: “Rangjti!” E tû tu ti ses rangjât te maniere piês che tu podevis: tu ses lât a parâti là di chêi che, prin o dopo, a saran bogns ancje di parâti vie, inpen di jessi slet cun chei doi che, insieme cun âtris (ti visistu, tû e Pup, a Cjasegnove?), a vevin volût dâti fiducie e riscjâ. Il to non, se tu t'inpensis, lu vin fat nô e seben che no tu ses stât di peraule, tû e il Vescul, no ti vin trat. Ti domandavin dome di jessi clâr, pai predis e pe int e ancje pe to cussiense.

Par dôs letaris sauridis, vincj rispuestis lamiis. No ti semèino ancje a ti masse? No ti dano l'idèe di chêi teiegrams ch'a publichin sul “Osservatore Romano” cuanche il pape si cjate intrigât? Ai mancjares dome che chês letaris s'es vessis fatis scrivi vuâtris! A mi, par dî il vêr, mi àn semeât

chei tassêi ch'a metin sul Messagjero, sastu là ch'a scrivin "Gli amici..." e jù i nons? Dome che chel biât, cun duncj i amîs ch'al à, nol torne di cà!

Tu às fat ben a metiju ducj. Cussì ju contìn e o savìn cui ch'a son. Pecjât che i argoments a setin tant flaps: cui cròdino di jessi?; o vin di volêsi bon; si à di salvâ simpri la caritât; e ce esemplis di predis!; a fasin i puliticans; se lôr a fasin cussì, ce pratindino di nô?; a vuelin tornâ a meti sù il patriarcjât; a son provincialiscj e cetera. Il plui biel resonarnent al è chel di Pagnut: fin che si din jù fra di nô, ma tocjâ il Vescul! Parcè, i predis sono çavatis?

Un om navigât come te, al veve di cirîsi âtris avocats. O sai che cuanche si cjape la pache si cîr di tornâle. Ur capite ancje ai nemâi, dal leon al bau, che chest al è il prin istinto, dome che bisugne tornâle cul cjâf e no cussì! Un ch'al lei la Vite Catoliche, cun tre pagjnîs di letaris (mai tancj scritôrs in Friûl, nancje sui problemas di fonde dal nestri popul!) sul inprin al reste scaturît: ducj sun chel fil. Però, passade la scalmane, si nacuargisi ch'a semeavin fûcs e a erin fusetis e petardos ch'a fasin plui fum e damp che no util. L'argument plui grant al è che Pauli e Tunin e àn mancjât di creance a ufindi un scritôr che, tal lôr intendo, al dismentèe la gramatiche. Jò nò mi eri nancje visât, par dî la veretât, ancje se dopo, cjalant la rispueste di B. S. si podares pensâ che un "periodo" nol steti sù parceche j mancje il sogjet e il verbo. Ma pai grancj scritôrs, si pô ancje lassâ cori. O disevi, duncje, che nô o vin di jessi striâts: o sbalgjn simpri tal mût di dî, in te peraule, tal galateo, te creance. O sin masse clârs e nus mancje chê tatiche che tocje vê in di di vuê ... Ce ustu? O sin a stâ framieç di int ch'a porcone, che s'incjoche, che no sa ce ch'al è il "compromesso storico", che no j intaressa "l'apertura internazionale", che no jè impegnade come "cattolici per il socialismo". Chî di nô j domadin al plevan se la Glesie e jè cui parons o no; s'a siervîs a alc o no; se in tun taramot. come il nestri, e à alc di sostanse o si contente di piulâ. Pa la cuâl o vin cjapât sù chel brut vissiât di dî ce ch'o pensin in maniere pôc "catoliche", trascurant la caritât pitost di dâj damp 'e veretât. I tiei amîs, invessit, a son tant ninins, tal mût di dâ jù che ti copin cence fâti berlâ. Rude caritât, dal prin al ultim! Sun chest, ur doi tuart ai miei amîs: no varessin mai vût di dismovi il gjespâr de Caritât!

Burel, tu vevis une grande ocasion e tu le às pierdude. Tu às volût fruçâ doi predis che, in cussiense, ti visavin. Nô o crodìn inmò te cussiense e che si à di rispuindi des nestris asions, in chest e in chelâtri mont. Ma forsit o feveli di robis che no tu capîs... Tu às volût vinci: vincj a doi. Ansit vincjeun, par vie che ancje Pup si è sintût in dovê di visânus ch'o vin di vergognâsi. Cumò a ven la Caresime, Pup, e si vergognìn pardabon. Par vê crodût tai bausârs.

Prin di lassâsi, par finîle in glorie, o volevi contâti chê sflocje di chel soldât talin ch'j veve batût un telegramp al cjapitani là ch'al diseve ch'al ere rivât adore di caturâ vincj todescs. "Mènjû jù" j disè il cjapitani. "No mi lassin!" j rispuindè il soldât.

Mandi e salute la to int.

Val e Rualp, ai 20 di fevrâr dal 1977

pre Antoni Beline